

AÑO 19. Sábado 30 Agosto de 1879. NÚM. 457.



BOLETIN OFICIAL ECLESIÁSTICO

del

OBISPADO DE MALLORCA.

SANCTISSIMI DOMINI NOSTRI

LEONIS

DIVINA PROVIDENTIA

PAPAE XIII

EPISTOLA ENCYCLICA

AD PATRIARCHAS PRIMATES ARCHIEPISCOPOS

ET EPISCOPOS UNIVERSOS CATHOLICI ORBIS

GRATIAM ET COMMUNIONEM

CUM APOSTOLICA SEDE HABENTES

VENERABILIBUS FRATRIBUS

PATRIARCHIS PRIMATIBUS ARCHIEPISCOPIS

ET EPISCOPIS UNIVERSIS CATHOLICI ORBIS

GRATIAM ET COMMUNIONEM

CUM APOSTOLICA SEDE HABENTIBUS.

LEO PP. XIII.

VENERABILES FRATRES

SALUTEM ET APOSTOLICAM BENEDICTIONEM.

Aeterni Patris Unigenitus Filius, qui in terris apparuit, ut
humano generi salutem et divinae sapientiae lucem afferret,
magnum plane ac mirabile mundo contulit beneficium, cum

caelos iterum ascensurus, Apostolis praecepit, ut euntes docerent omnes gentes (1); Ecclesiamque a se conditam communem et supremam populorum magistram reliquit. Homines enim, quos veritas liberaverat, veritate erant conservandi: neque diu permansissent caelestium doctrinarum fructus, per quos est homini parta salus, nisi Christus Dominus erudiendis ad fidem mentibus perenne magisterium constituisse. Ecclesia vero divini Auctoris sui cum erecta promissis, tum imitata caritatem, sic iussa perfecit, ut hoc semper spectaret, hoc maxime voluerit, de religione praecipere et cum erroribus perpetuo dimicare. Huc sane pertinent singulorum Episcoporum vigilati labores, hic Conciliorum perlatae leges ac decreta, et maxime Romanorum Pontificum sollicitudo quotidiana, penes quos, beati Petri Apostolorum Principis in primatu successores, et ius et officium est docendi et confirmandi fratres in fide.— Quoniam vero, Apostolo monente, per philosophiam et inanem fallaciam (2). Christifideli mentes decipi solent, et fidei sinceritas in hominibus corrumpi, idcirco supremi Ecclesiae Pastores munēris sui perpetuo esse duxerunt etiam veri nominis scientiam totis viribus provehere, simulque singulari vigilantia providere, ut ad fidei catholicae normam ubique traderentur humanae disciplinae omnes, praesertim vero *philosophia*, a qua nimirum magoꝝ ex parte pendet ceterarum scientiarum recta ratio. Id ipsum et nos inter cetera breviter monuimus. Venerabiles Fratres, cum primum Vos omnes per Litteras Encyclicas allocuti sumus; sed modo rei gravitate, et temporum conditio-ne compellimur rursus Vobiscum agere de ineunda philosophorum studiorum ratione, quae et bono fidei apte respondeat, et ipsi humanarum scientiarum dignitati sit consentanea.

Si quis in acerbitatē nostrorum temporum animum inten-dat, earumque rerum rationem, quae publice et privatum geruntur, cogitatione complectatur, is profecto comperiet, secundam malorum causam, cum eorum quae premunt, tum eorum quae pertimescimus, in eo consistere, quod prava de diviis humanisque rebus scita, e scholis philosophorum iampridem profecta, in omnes civitatis ordines irrepserint, communi plurimorum suffragio recepta. Cum enim insitum homini natura sit, ut in agendo rationem ducem sequatur, si quid intelligentia peccat, in id et voluntas facile labitur: atque ita contingit, ut pravitas opinionum, quarum est in intelligentia sedes, in humanas actiones influat, easque pervertat. Ex adverso, si sana mens hominum fuerit, et solidis verisque principiis firmiter insistat, tum vero in publicum privatumque commodum plurimia beneficia progignet.— Evidem non tantum humanae philosophiae vim et auctoritatem tribuimus, ut cunctis omnino

erroribus propulsandis, vel evellendis parem esse iudicemus: sicut enim, cum primum est religio christiana constituta, per admirabile fidei lumen non persuasibilibus humanae sapientiae verbis diffusum, sed in ostensione spiritus et virtutis (3); orbiterum contigit ut primaevae dignitati restitueretur; ita etiam in praesens ab omnipotenti potissimum virtute et auxilio Dei expectandum est, ut mortalium mentes, sublatis errorum nebris, resipiscant. Sed neque spernenda, neu posthabenda sunt naturalia adiumenta, quae divinae sapientiae beneficio, fortiter suaviterque omnia disponentis, hominum generi suppetunt; quibus in adiumentis rectum philosophiae usum constat esse praecipuum. Non enim frustra rationis lumen humanae menti Deus inseruit; et tantum abest, ut superaddita fidei lux intelligentiae virtutem extinguat aut imminuat, ut potius perficiat, auctisque viribus, habilem ad maiora reddat.—Igitur postulat ipsius divinae Providentiae ratio, ut in revocandis ad fidem et ad salutem populis etiam ab humana scientia praesidium quaeratur: quam industriam, probabilem ac sapientem, in more positam fuisse praeclarissimorum Ecclesiae Patrum, antiquitatis monumenta testantur. Illi scilicet neque paucas, neque tenues rationi partes dare consueverunt, quas omnes per breviter complexus est magnus Augustinus, *huius scientiae tribuens... illud quo fides saluberrima... gignitur, nutritur, defenditur, corroboratur* (4).

Ac primo quidem philosophia, si rite a sapientibus usurpetur, iter ad veram fidem quodammodo sternere et munire vallet, suorumque alumnorum animo ad revelationem suscipiendum convenienter praeparare: quamobrem a veteribus modo *prævia ad christianam fidem institutio* (5), modo *christianismi præludium et auxilium* (6), modo *ad Evangelium paedagogus* (7) non immerito appellata est.

Et sane benignissimus Deus, in eo quod pertinet ad res divinas, non eas tantum veritates lumine fidei patefecit, quibus attingendis impar humana intelligentia est, sed nonnullas etiam manifestavit, rationi non omnino impervias, ut scilicet, accedente Dei auctoritate, statim et sine aliqua erroris admixtione omnibus innotescerent. Ex quo factum est, ut quaedam vera, quae vel divinitus ad credendum proponuntur, vel cum doctrina fidei arctis quibusdam vinculis colligantur, ipsi ethniconrum sapientes, naturali tantum ratione praelucente, cognoverint, aptisque argumentis demonstraverint ac vindicaverint. «Invisibilia enim ipsius,» ut Apostolus inquit, «a creatura mundi per ea, quae facta sunt, intellecta conspicuntur, semper iterna quoque eius virtus et divinitas (8); et gentes quae legem non habent... ostendunt nihilominus opus legis scriptum

»in cordibus suis» (9). Haec autem vera, vel ipsis ethnicorum sapientibus explorata, vehementer est opportunum in revelatae doctrinae commodum utilitatemque convertere, ut re ipsa ostendatur, humanam quoque sapientiam, atque ipsum adversariorum testimonium fidei christiana suffragari. Quam agendi rationem, non recens introductam, sed velerem esse constat, et sanctis Ecclesiae Patribus saepe usitatam. Quin etiam venerabiles isti religiosarum traditionum testes et custodes formam quamdam eius rei et prope figuram agnoscent in Hebraeorum facto, qui Aegypto excessuri, deserre secum iussi sunt argentea atque aurea Aegyptiorum vasa cum vestibus pretiosis, ut scilicet, mutato repente usu, religioni veri Numinis ea supellex dedicaretur, quae prius ignominiosis ritibus et superstitioni inservierat. Gregorius Neocaesariensis (10) laudat Origenem hoc nomine, quod plura ex ethnicorum placitis ingeniose decerpta, quasi erecta hostibus tela, in patrocinium christiana sapientiae et perniciem superstitionis singulari dexteritate rectorserit. Et parem disputandi morem cum Gregorius Nazianzenus (11), tum Gregorius Nyssenus (12) in Basilio Magno et laudant et probant; Hieronymus vero magnopere commendat in Quadrato Apostolorum discipulo, in Aristide, in Iustino, in Irenaco, aliisque permultis (13). Augustinus autem, «Nonne aspicimus, *inquit*, quanto auro et argento et veste suffarcinatus exierit de Aegypto Cyprianus, doctor suavissimus et martyris beatissimus? quanto Lactantius? quanto Victorinus, Opatus, Hilarius? ut de vivis taceam, quanto innumerabiles Graeci?» (14) Quod si vero naturalis ratio optimam hanc doctrinæ segelem prius fudit, quam Christi virtute secundaretur, multo uberiorem certe progignet, posteaquam Salvatoris gratia nativas humanae mentis facultates instauravit et auxit.—Ecquis autem non videat, iter planum et facile per huiusmodi philosophandi genus ad fidem aperire?

Non his tamen limitibus utilitas circumscribitur, quae ex illo philosophandi instituto dimanat. Et revera divinae sapientiae eloquiis graviter reprehenditur eorum hominum stultitia, qui «de his quae videntur bona, non potuerunt intelligere Eum qui est; neque, operibus attendentes, agnoverunt quis esset artifex» (15). Igitur primo loco magnus hic et praeclarus ex humana ratione fructus capitur, quod illa Deum esse demonstrat: «a magnitudine enim speciei et creaturae cognoscibili liter poterit Creator horum videri.» (16).—Deinde Deum ostendit omnium perfectionum cumulo singulariter excellere, infinita in primis sapientia, quam nulla usquam res latere, et summa iustitia, quam pravus nunquam vincere possit affectus, ideoque Deum non solum veracem esse, sed ipsam etiam veri-

tatem falli et fallere nesciam. Ex quo consequi perspicuum est, ut humana ratio pleaissimam verbo Dei fidem atque auctoritatem conciliet.—Simili modo ratio declarat, evangelicam doctrinam mirabilibus quibusdam signis, tamquam certis certae veritatis argumentis, vel ab ipsa origine emicuisse: atque ideo omnes, qui Evangelio fidem adiungunt, non temere adiungere, tamquam doctas fabulas secutos (17), sed rationabili prorsus obsequio intelligentiam et iudicium suum divinae subiicere auctoritati. Illud autem non minoris pretii esse intelligitur, quod ratio in perspicuo ponat, Ecclesiam a Christo institutam (ut statuit Vaticana Synodus) «ob suam admirabilem propagationem, eximiam sanctitatem et inexhaustam in omnibus locis »fecunditatem, ob catholicam unitatem, invictamque stabilitatem, magnum quoddam et perpetuum esse motivum credibilitatis, et divinae suae legationis testimonium irrefragabile» (18).

Solidissimis ita positis fundamentis, perpetuus et multiplex adhuc requiritur philosophiae usus, ut sacra Theologia naturam, habitum, ingeniumque verae scientiae suscipiat atque induat. In hac enim nobilissima disciplinarum magnopere necesse est, ut multae ac diversae caelestium doctrinarum partes in unum veluti corpus colligantur, ut suis quaeque locis convenienter dispositae, et ex propriis principiis derivatae apto inter se nexus cohaereant; demum ut omnes et singulae suis iisque invictis argumentis confirmentur.—Nec silentio praeter-eunda, aut minimi facienda est accuratior illa atque uberior rerum, quae creduntur, cognitio, et ipsorum fidei mysteriorum, quoad fieri potest, aliquanto lucidior intelligentia, quam Augustinus aliique Patres et laudarunt et assequi studuerunt, quamque ipsa Vaticana Synodus (19) fructuosissimam esse decrevit. Eam siquidem cognitionem et intelligentiam plenius et facilius certe illi consecuntur, qui cum integritate vitae fideique studio ingenium coniungunt philosophicis disciplinis expolitum, praesertim cum eadem Synodus Vaticana doceat, eiusmodi sacrorum dogmatum intelligentiam «tum ex eorum, quae naturaliter cognoscuntur, analogia; tum e mysteriorum ipsorum nexu inter se et cum fine hominis ultimo» peti oportere (20).

Postremo hoc quoque ad disciplinas philosophicas pertinet, veritates divinitus traditas religiose tueri, et iis qui oppugnare audeant resistere. Quam ad rem, magna est philosophiae laus, quod fidei propugnaculum ac veluti firmum religionis munimentum habeatur. *Est quidem*, sicut Clemens Alexandrinus testatur, «per se perfecta et nullius indigua Servatoris doctrina, cum sit Dei virtus et sapientia. Accedens autem graeca philosophia veritatem non facit potentiorem; sed cum debiles effi-

»ciat sophistarum adversus eam argumentationes, et propulset
 »dolosas adversas veritatem insidias, dicta est vineae apta se-
 »pes et vallis.» (21) Profecto sicut inimici catolici nominis,
 »adversus religionem pugnaturi, bellicos apparatus plerumque
 a philosophica ratione mutuantur, ita divinarum scientiarum
 defensores plura e philosophia penu depromunt, quibus reve-
 lata dogmata valeant propugnare. Neque mediocriter in eo
 triumphare fides christiana censenda est, quod adversario-
 rum arma, humanae rationis artibus ad nocendum compa-
 rata, humana ipsa ratio potenter expediteque repellat. Quam
 speciem religiosi certaminis ab ipso gentium Apostolo usur-
 patam commemoratus est Hieronymus scribens ad Magnum:
 »Ductor christiani exercitus Paulus et orator invictus, pro
 »Christo causam agens, etiam inscriptionem fortuitam arte tor-
 »quet in argumentum fidei: didicerat enim a vero David ex-
 »torquere de manibus hostium gladium, et Goliath superbis-
 »simi caput proprio mucrone truncare» (22). Atque ipsa Eccle-
 sia istud a philosophia praesidium christianos doctores petere
 non tantum suadet, sed etiam iubet. Etenim Concilium Latera-
 nense V, posteaquam constituit, «omnem assertionem veritati
 »illuminatae fidei contrariam omnino falsam esse, eo quod ve-
 »rum vero minime contradicat» (23), philosophia doctoribus
 praecipit, ut in dolosis argumentis dissolvendis studiose ver-
 sentur; siquidem, ut Augustinus testatur, «si ratio contra di-
 »vinarum Scripturarum auctoritatem redditur, quamlibet acuta
 »sit, fallit veri similitudine; nam vera esse non potest» (24).

Verum ut pretiosis hisce, quos memoravimus, afferendis
 fructibus par philosophia inveniatur, omnino oportet, ut ab eo
 tramite numquam deflectat, quem et veneranda Patrum anti-
 quitas ingressa est, et Vaticana Synodus solemni auctoritatis
 suffragio eomprobavit. Scilicet cum plane compertum sit, plu-
 rimas ex ordine supernaturali veritates esse accipiendas, quae
 cuiuslibet ingenii longe vincunt acumen; ratio humana, pro-
 priae infirmitatis conscientia, maiora se affectare ne audeat, neque
 easdem veritates negare, neve propria virtute metiri, neu pro-
 lubitu interpretari; sed eas potius plena atque humili fide sus-
 cipiat, et summi honoris loco habeat, quod sibi liceat, in mo-
 rem ancillae et pedissequae, famulari caelestibus doctrinis,
 easque aliqua ratione, Dei beneficio, attingere.—In iis autem
 doctrinarum capitibus, quae percipere humana intelligentia na-
 turaliter potest, aequum plane est, sua metodo, suisque prin-
 cipiis et argumentis uti philosophiam: non ita tamen, ut auc-
 toritati divinae sese audacter subtrahere videatur. Imo, cum
 constet, ea quae revelatione innotescunt, certa veritate pollere,
 et quae fidei adversantur pariter cum recta ratione pugnare,

deverit philosophus catholicus se fidei simul et rationis iura violaturum, si conclusionem aliquam amplectatur, quam relevantiae doctrinae repugnare intellexerit.

Novimus profecto non deesse, qui facultates humanae naturae plus nimio extollentes, contendunt, hominis intelligentiam, ubi semel divinae auctoritati subiiciatur, e nativa dignitate excidere, et quodam quasi servitutis iugo demissam plurimum retardari atque impediri, quominus ad veritatis excellentiaeque fastigium progrediatur.—Sed haec plena erroris et fallaciae sunt; eoque tandem spectant, ut homines, summa cum stultitia, nec sine crimine ingrati animi, sublimiores veritates repudient, et divinum beneficium fidei, ex qua omnium bonorum fontes etiam in civilem societatem fluxere, sponte reiiciant. Etenim cum humana mens certis finibus, iisque satis angustis, conclusa teneatur, pluribus erroribus, et multarum rerum ignoracioni est obnoxia. Contra fides christiana, cum Dei auctoritate nitatur, certissima est veritatis magistra; quam qui sequitur, neque errorum laqueis irretitur, neque incertarum opinionum fluctibus agitatur. Quapropter qui philosophiae studium cum obsequio fidei christiana coniungunt, ii optime philosophantur: quandoquidem divinarum veritatum splendor, animo exceptus, ipsam invat intelligentiam; cui non modo nihil de dignitate detrahit, sed nobilitatis, acuminis, firmitatis plurimum addit.—Cum vero ingenii aciem intendut in refellendis sententiis, quae fidei repugnant, et in probandis, quae cum fide cohaerent, digne ac perutiliter rationem exercent: in illis enim prioribus, causas erroris deprehendunt, et argumentorum, quibus ipsae fulciuntur, vitium dignoscunt: in his autem posterioribus, rationum momentis potiuntur, quibus solide demonstrantur et cuilibet prudenti persuadeantur. Hac vero industria et exercitatione augeri mentis opes et explicari facultates qui neget, ille veri falsique discrimen nihil conducere ad profectum ingenii, absurde contendat necesse est. Merito igitur Vaticana Synodus praeclera beneficia, quae per fidem rationi praestantur, his verbis commemorat: «Fides rationem »ab erroribus liberat ac tuetur, eamque multiplici cognitione instruit» (25). Atque idcirco homini, si saperet, non culpanda fides, veluti rationi et naturalibus veritatibus inimica, sed dignae potius Deo grates essent habendae, vehementerque laetandum, quod, inter multas ignorantiae causas et in mediis errorum fluctibus, sibi fides sanctissima illuxerit, quae, quasi sidus amicum, citra omnem errandi formidinem portum veritatis monstrat.

Quod si, Venerabiles Fratres, ad historiam philosophiae respiaciatis, cuncta, quae paulo ante diximus, re ipsa comprobari

intelligetis. Et sane philosophorum veterum, qui fidei beneficio caruerunt, etiam qui habebantur sapientissimi, in pluribus deterime errarunt. Nostis enim, inter nonnulla vera, quam saepe falsa et absona, quam multa incerta et dubia tradiderint de vera divinitatis ratione, de prima rerum origine, de mundi gubernatione, de divina futurorum cognitione, de malorum causa et principio, de ultimo fine hominis, aeternaque beatitudine, de virtutibus et vitiis, aliisque doctrinis, quarum vera certaque notitia nihil magis est hominum generi necessarium. — Contra vero primi Ecclesiae Patres et Doctores, qui satis intellexerant, ex divinae voluntatis consilio, restitutorem humanae etiam scientiae esse Christum, qui Dei virtus est Deique sapientia (26), et «in quo sunt omnes thesauri sapientiae et scientiae absconditi» (27), veterum sapientum libros investigandos, eorumque sententias cum revelatis doctrinis conferendas suscepere: prudentique delectu quae in illis vere dicta et sapienter cogitata occurserent, amplexi sunt, ceteris omnibus vel emendatis, vel reiectis. Nam providissimus Deus, sicut ad Ecclesiae defensionem martyres fortissimos, magnae animae prodigos, contra tyrannorum saevitatem excitavit, ita philosophis falsi nominis aut haereticis viros sapientia maximos obiecit, qui revelatarum veritatum thesanum etiam rationis humanae praesidio tuerentur. Itaque ab ipsis Ecclesiae primordiis, catholica doctrina eos nacta est adversarios multo infensissimos, qui christianorum dogmata et instituta irridentes, ponebant plures esse deos, mundi materiam principis causaque caruisse, rerumque cursum caeca quadam vi et fatali contineri necessitate, non divinae providentiae consilio administrari. Iamvero cum his insanientis doctrinae magistris mature congressi sunt sapientes viri, quos *Apologetas* nominamus, qui, fide praeante, ab humana quoque sapientia argumenta sumpserunt, quibus constituerent, unum Deum, omni perfectionum genere praestantissimum esse colendum; res omnes e nihilo omnipotenti virtute productas, illius sapientia vigere, singulasque ad proprios fines dirigi ac moveri. — Principem inter illos sibi locum vindicat *s. Iustinus* martyr, qui posteaquam celeberrimas graecorum Accademias, quasi experiendo, lustrasset, plenoque ore nonnisi ex revelatis doctrinis, ut idem ipse satetur, veritatem hanriri posse pervidisset, illas toto animi ardore complexus, calumnis purgavit, penes Romanorum Imperatores acriter copioseque defendit, et non pauca graecorum philosophorum dicta cum eis composuit. Quod et *Quadratus* et *Aristides*, *Hermias* et *Athenagoras* per illud tempus egregie praesliterunt. — Neque minorem in eadem causa gloriam adeptus est *Irenaeus*, martyr invictus, Ecclesiae Lugdunensis Pontifex: qui cum strenue re-

sotaret perversas orientalium opiniones, Gnosticorum opera per fines romani imperii disseminatas, «origines haereseon singularum (auctore Hieronymo), et ex quibus philosophorum fontibus emanarint..... explicavit» (28)—Nemo autem non novit *Clementis Alexandrini* disputationes, quas idem Hieronymus, sic, honoris causa, commemorat: «Quid in illis indoctum? imo quid non de media philosophia est?» (29) Multa ipse quidem incredibili varietate disseruit ad condendam philosophiae historiam, ad artem dialecticam rite exercendam, ad concordiam rationis cum fide conciliandam utilissima.—Hunc secutus *Origenes*, scholae Alexandrinae magisterio insignis, graecorum et orientalium doctrinis eruditissimus, perplura eademque laboriosa edidit volumina, divinis litteris explanandis, sacrisque dogmatibus illustrandis mirabiliter opportuna; quae licet erroribus, saltem ut nunc extant, omnino non vacent, magnam tamen complectuntur vim sententiarum, quibus naturales veritates et numero et firmitate augentur.—Pugnat cum haereticis *Tertullianus* auctoritate sacrarum Litterarum, cum philosophis, mutato armorum genere philosophice; hos autem tam acute et erudite convincit, ut iisdem palam fidenterque obiciat: «Neque scientia, neque de disciplina, ut putatis, aequamur» (30).—*Arnobius* etiam, vulgatis adversus gentiles libris, et *Lactantius* divinis praesertim Institutionibus, pari eloquentia et robore dogmata ac praecepta catholicae sapientiae persuadere hominibus strenue nituntur, non sic philosophiam evertentes, ut Academicci solent (31), sed partim suis armis, partim vero ex philosophorum ioter se concertatione sumptis eos revincentes (32).—Quae autem de anima humana, de divinis attributis, aliquique maximi momenti quaestionibus magnus *Athanasius* et *Chrysostomus* oratorum princeps, scripta reliquerunt, ita, omnium iudicio, excellunt, ut prope nihil ad illorum subtilitatem et copiam addi posse videatur.—Et ne singulis recensendis nimissimus, summorum numero virorum, quorum est mentio facta, adiungimus *Basilium* magnum et ultrumque *Gregorium*, qui, cum Athenis, ex domicilio totius humanitatis, exiissent philosophiae omnis apparatu affatim instructi, quas sibi quisque doctrinae opes inflammato studio pepererat, eas ad haereticos refutandos, instituendosque christianos converterunt.—Sed omnibus veluti palmam praeripuisse visus est *Augustinus*, qui ingenio praepotens, et sacris profanisque disciplinis ad plenum imbutus, contra omnes suae aetatis errores acerrime dimicavit fide summa, doctrina pari. Quem ille philosophiae locum non attingit; imo vero quem non diligentissime investigavit, sive cum altissima fidei mysteria et fidelibus aperiret, et contra adversariorum vesanos impetus defenderet; sive cum, Academi-

corum aut Manichaeorum commentis deletis, humanae scientiae fundamenta et firmitudinem in tuto collocavit, aut malorum, quibus premuntur homines, rationem et originem et causas est persecutus? Quanta de Angelis, de anima, de mente humana, de voluntate et libero arbitrio, de religione et de beata vita, de tempore et aeternitate, de ipsa quoque mutabilium corporum natura subtilissime disputavit? — Post id tempus per Orientem *Ioannes Damascenus*, Basilii et Gregorii Nazianzeni vestigia ingressus, per Occidentem vero *Boetius* et *Anselmus*, Augustini doctrinas professi, patrimonium philosophiae plurimum locupletarunt.

Exinde mediae aetatis Doctores, quos *Scholasticos* vocant, magnae molis opus aggressi sunt, nimirum segetes doctrinae secundas et uberes, amplissimis Sanctorum Patrum voluminibus diffusas, diligenter congerere, congestasque uno velut loco condere, in posterorum usum et commoditatem. — Quae autem scholasticae disciplinae sit origo, indoles et excellentia, invat hic, Venerabiles Fratres, verbis sapientissimi viri, Praedecessoris Nostri, Sixti V fusiū aperire: «Divino illius munere, qui solus dat spiritum scientiae et sapientiae et intellectus, quique Ecclesiam suam per saeculorum aetas, prout opus est, novis beneficiis auget, novis praesidiis instruit, inventa est a maioriis nostris sapientissimis viris, Theologia scholastica, quam duo potissimum gloriosi Doctores, angelicus s. Thomas et seraphicus s. Bonaventura, clarissimi huius facultatis professores..... excellenti ingenio, assiduo studio, magnois laboribus et vigiliis excoluerunt atque ornarunt, eamque optime dispositam, multisque modis paeclare explicatam posteris tradiderunt. Et huius quidem tam salutaris scientiae cognitio et exercitatio, quae ab uberrimis divinarum Litterarum, summorum Pontificum, sanctorum Patrum et Conciliorum fontibus dimicat, semper certe maximum Ecclesiae adiumentum affere potuit, sive ad Scripturas ipsas vere et sane intelligendas et interpretandas, sive ad Patres securius et utilius perlegendos et explicandos, sive ad varios errores et haereses detegendas et refellendas: his vero novissimis diebus, quibus iam advenerunt tempora illa periculosa ab Apostolo descripta, et homines blasphemi, superbi, seductores proficiunt in peius, errantes et alios in errorem mittentes, sane catholicae fidei dogmatibus confirmandis et haeresibus confutandis pernecessaria est» (33). Quae verba quamvis Theologiam scholasticam dumtaxat complecti videantur, tamen esse quoque de Philosophia eiusque laudibus accipienda perspicitur. Siquidem paeclarae dotes, quae Theologiam scholasticam hostibus veritatis faciunt tantopere formidolosam, nimirum, ut idem Pontifex

addit, «apta illa et inter se nexa rerum et causarum cohaerentia, ille ordo et dispositio tamquam militum in pugnando instructio, illae dilucidae definitiones et distinctiones, illa argumentorum firmitas et acutissimae disputationes, quibus lux a tenebris, verum a falso distinguitur, haereticorum mendacia multis praestigiis et fallaciis involuta, tamquam veste detracita, palefiunt et denudantur» (34), praeclarae, inquimus, et mirabiles istae dotes unice a recto usu repetendae sunt eius philosophiae, quam magistri scholastici, data opera et sapienti consilio, in disputationibus etiam theologicis, passim usurpare consueverunt.—Praeterea cum illud sit scholasticorum Theologorum proprium ac siogulare, ut scientiam humanam ac divinam arctissimo inter se vinculo coniunxerint, profecto Theologia, in qua illi excelluerunt, non erant tantum honoris et commendationis ab opinione hominum adeptura, si mancam atque imperfectam aut levem philosophiam adhibuissent.

Iamvero inter Scholasticos Doctores, omnium princeps et magister, longe eminet *Thomas Aquinas*; qui, uti Caietanus animadvertisit veteres «doctores sacros quia summe veneratus est, ideo intellectum omnium quodammodo sortitus est.» (35) Illorum doctrinas, velut dispersa cuiusdam corporis membra, in unum Thomas collegit et coagmentavit, miro ordine digessit, et magnis incrementis ita adauxit, ut catholicae Ecclesiae singulare praesidium et decus iure meritoque habeatur.—Ille quidem ingenio docilis et acer, memoria facilis et tenax, vitae integerrimus, veritatis unice amator, divina humanaque scientia praedives. Soli comparatus, orbem terrarum calore virtutum fovit, et doctrinae splendore complevit. Nulla est philosophiae pars, quam non acute simul et solide pertractarit: de legibus ratiocinandi, de Deo et incorporeis substantiis, de homine aliisque sensibilibus rebus, de humanis actibus eorumque principiis ita disputavit, ut in eo neque copiosa quaestionum seges, neque apta partium dispositio, neque optima procedendi ratio, neque principiorum firmitas aut argumentorum robur, neque dicendi perspicuitas aut proprietas, neque abstrusa quaeque explicandi facilitas desideretur.

Illud etiam accedit, quod philosophicas conclusiones angelicus Doctor speculatus est in rerum rationibus et principiis, quae quam latissime patent, et infinitarum fere veritatum semina suo velut gremio concludunt, a posterioribus magistris opportuno tempore et uberrima cum fructu aperienda. Quam philosophandi rationem cum in erroribus refutandis pariter adhibuerit, illud a se ipso impretravit, ut et superiorum temporum errores omnes unus debellarit, et ad profligandos, qui perpetua vice in posterum exorituri sunt, arma invictissima

suppeditarit.—Praeterea rationem, ut par est, a fide apprime distinguens, utramque tamen amice consocians, utriusque tum iura conservavit, tum dignitati consuluit, ita quidem ut ratio ad humanum fastigium Thomae pennis evecta, iam sere nequeat sublimius assurgere; neque fides a ratione sere possit plura aut validiora adiumenta praestolari, quam quae iam est per Thomam consecuta.

Has ob causas, doctissimi homines, superioribus praesertim aetatis, theologiae et philosophiae laude praestantissimi, conquisitis incredibili studio Thomae voluminibus immortalibus, angelicae sapientiae eius sese non tam excolendos, quam penitus innutriendos tradiderunt.—Omnes prope conditores et legiferos Ordinum religiosorum iussisse constat sodales suos, doctrinis s. Thomae studere et religiosius haerere, cauto, ne cui eorum impune liceat a vestigiis tanti viri vel minimum discedere. Ut Dominicanam familiam praetereamus, quae summum hoc magistro iure quodam suo gloriatur, ea lege teneri Benedictinos, Carmelitas, Augustinianos, Societatem Iesu, aliosque sacros Ordines complures, statuta singulorum testantur.

Atque hoc loco magna cum volupitate provolat animus ad celeberrimas illas, quae olim in Europa floruerunt, Academias et Scholas, Parisiensem nempe, Salmatinam, Complutensem, Duscenam, Tolosanam, Lovaniensem, Patavinam, Bononiensem, Neapolitanam, Conimbricensem, aliasque permultas. Quarum Academiarum nomen aetate quodammodo crevisse, rogatasque sententias, cum graviora agerentur negotia, plurimum in omnes partes valuisse, nemo ignorat. Iamvero compertrum est, in magnis illis humanae sapientiae domiciliis, tamquam in suo regno, Thomam consedisse principem; atque omnium vel doctorum vel auditorum animos miro consensu in unius angelici Doctoris magisterio et auctoritate conquievisse.

Sed, quod pluris est, Romani Pontifices Praedecessores Nostri sapientiam Thomae Aquinatis singularibus laudum praecocis, et testimoniis amplissimis prosecuti sunt. Nam Clemens VI (36), Nicolaus V (37) Benedictus XIII (38) aliique testantur, admirabili eius doctrina universam Ecclesiam illustrari; s. Pius V (39) vero fatetur eadem doctrina haereses confusas et convictas dissipari, orbemque universum a pestiferis quotidie liberari erroribus; alii cum Clemente XII (40), uberrima bona ab eius scriptis in Ecclesiam universam dimanassee. Ipsumque eodem honore colendum esse affirmant, qui summis Ecclesiae doctoribus, Gregorio, Ambrosio, Augustino et Hieronymo defertur; alii tandem S. Thomam proponere non dubitarunt Academias et magnis Lyceis exemplar et magistrum, quem tuto pede sequeretur. Qua in re memoratu dignissima videntur,

b. Urbani V verba ad Academiam Tolosanam: «Volumus et teneore praesentium vobis iniungimus, ut b. Thomae doctrinam »lamquam veridicam et catholicam sectemini, eamdemque studieatis totis viribus ampliare» (41). Urbani autem exemplum Innocentius XII (42) in Lovaniensi studiorum Universitate, et Benedictus XIV (43) in Collegio Dionysiano Granatensem renovarunt.—His vero Pontificum maximorum de Thoma Aquinate iudiciis, veluti cumulus, Innocentii VI testimonium accedit: «Huius (*Thomae*), doctrina pree ceteris, excepta canonica, »habet proprietatem verborum, modum dicendorum, veritatem »sententiarum, ita numquam qui eam tenuerint, inveniantur a »veritatis tramite deviasse; et qui eam impugnaverit, semper »suerit de veritate suspectus» (44).

Ipsa quoque Concilia Oecumenica, in quibus eminent lectus ex toto orbe terrarum flos sapientiae, singularem Thomae Aquinatis honorem habere perpetuo studuerunt. In Conciliis Lugdunensi, Viennensi, Florentino, Vaticano, deliberationibus et decretis Patrum intersuisse Thomam et pene praefuisse dixeris, adversus errores Graecorum haereticorum et rationalistarum ineluctabili vi et faustissimo exitu decertantem.—Sed haec maxima est et Thomae propria, nec cum quopiam ex doctoribus catholicis comunicata laus, quod Patres Tridentini, in ipso medio conclavi ordini habendo, una cum divinae Scripturae codicibus et Pontificum Maximorum decretis *Summam Aquinatis* super altari patere voluerunt, unde consilium, rationes, oracula peterentur.

Postremo haec quoque palma viro incomparabili reservata videbatur, ut ab ipsis catholici nominis adversariis obsequia, paeconia, admirationem extorqueret. Nam exploratum est, inter haereticarum factionum duces non defuisse, qui palam profiterentur, sublata semel e medio doctrina Thomae Aquinatis, se facile posse *cum omnibus* catholicis doctoribus «subire certamem et vincere, et Ecclesiam dissipare» (45).—Ibanis quidem spes, sed testimonium non inane.

His rebus et causis, Venerabiles Fratres, quoties respicimus ad bonitatem, vim paeclarasque utilitates ejus disciplinae philosophicae, quam maiores nostri adamarunt iudicamus temere esse commissum, ut eidem suus honos non semper, nec ubique permanserit: praesertim cum philosophiae scholasticae et usum diuturnum et maximorum virorum iudicium, et, quod caput est, Ecclesiae suffragium favisse constaret. Atque in veteris doctrinae locum nova quaedam philosophicae ratio hac illac successit, unde non ii percepti sunt fructus optabiles ac salutares, quos Ecclesia et ipsa civilis societas maluissent. Adnitentibus enim Novatoribus saeculi XVI, placuit philoso-

phari citra quempiam ad fidem respectum, petita dataque vicissim potestate quaelibet pro lubitu ingenioque excogitandi. Qua ex re primum fuit, genera philosophiae plus aequo multiplicari, sententiasque diversas atque inter se pugnantes oriri etiam de iis rebus, quae sunt in humanis cognitionibus praecipuae. A multitudine sententiarum ad haesitationes dubitationesque persaepe ventum est: a dubitationibus vero in errorem quam facile mentes hominom delabuntur, nemo est qui non videat. — Hoc autem novitatis studium, cum homines imitatione trahantur, catholicorum quoque philosophorum animos visum est alicubi pervasisse: qui patrimonio antiquae sapientiae posthabito, nova moliri, quam vetera novis augere et perficere maluerunt, certe minus sapienti consilio, et non sine scientiarum detrimento. Etenim multiplex haec ratio doctrinae, cum in magistrorum singulorum auctoritate arbitrioque nitatur, mutabile habet fundamentum, eaque de causa non firmam atque stabilem neque robustam, sicut veterem illam, sed nutantem et levem facit philosophiam. Cui si forte contingat, hostium impetu ferendo vix parem aliquando inveniri, ejus rei agnoscat in seipsa residere causam et culpam. — Quae cum dicimus, non eos profecto improbamus doctos homines atque solertes, qui industriam et eruditionem suam, ac novorum inventorum opes ad excolendam philosophiam afferunt: id enim probe intelligimus ad incrementa doctrinae pertinere. Sed magnopere cavendum est, ne in illa industria atque eruditione tota aut praecipua exercitatio versetur. — Et simili modo de sacra Theologia iudicetur; quam multiplici eruditionis adiumento iuvari atque illustrari quidem placet; sed omnino necesse est, gravi Scholasticorum more tractari, ut, revelationis et rationis coniunctis in illa viribus, *invictum fidei propugnaculum* (46) esse perseveret.

Optimo itaque consilio cultores disciplinarum philosophicarum non pauci, cum ad instaurandam utiliter philosophiam novissime animum adiecerint, praeclaram Thomae Aquinatis doctrinam restituere, atque in pristinum decus vindicare studuerunt et student. Pari voluntate plures ex ordine Vestro, Venerabiles Fratres, eamdem alacriter viam esse ingressos, magna cum animi nostri laetitia cognovimus. Quos cum laudamus vehementer, tum hortamur, ut in suscepto consilio, permaneant: reliquos vero omnes ex Vobis singulatim monemus, nihil Nobis esse antiquius et optabilius, quam ut sapientiae rivos purissimos, ex angelico Doctore iugi et praedivite vena dimanantes, studiosae iuventuti large copioseque universi praebatis.

Quae autem faciunt, ut magno id studio velimus, plura

sunt.—Principio quidem, cum in hac tempestate nostra, machinationibus et astu fallacis cuiusdam sapientiae, christiana fides oppugnari soleat, cuncti adolescentes, sed ii nominatum qui in Ecclesiae spem succrescunt, pollenti ac robusto doctrinae pabulo ob eam causam enutriendi sunt, ut viribus validi, et copiosa armorum apparatu instructi, mature assuescant causam religionis fortiter et sapienter agere, *parati semper*, secundum Apostolica monita, «ad satisfactionem omni poscenti rationem de ea, quae in nobis est, spe (47); et exhortari in doctrina sana, et eos qui contradicunt, arguere» (48).— Deinde plurimi ex iis hominibus qui, ab alienato a fide animo, instituta catholica oderunt, solam sibi esse magistrum ac dum rationem profitentur. Ad hos autem sanandos, et in gratiam cum fide catholica restituendos, praeter supernaturale Dei auxilium, nihil esse opportunius arbitramur, quam solidam Patrum et Scholasticorum doctrinam, qui firmissima fidei fundamenta, divinam illius originem, certam veritatem, argumenta quibus suadetur, beneficia in humanum genus collata, perfectamque cum ratione concordiam tanta evidentia et vi commonstrant, quanta flectendis mentibus vel maxime invitis et repugnantibus abunde sufficiat.

Domestica vero, atque civilis ipsa societas, quae ob persvarum opinionum pestem quanto in discrimini versetur, universi perspicimus, profecto peccator multo et securior consistet, si in Academiis et scholis sanior traderetur, et magisterio Ecclesiae conformior doctrina, qualem Thomae Aquinatis volumina complectuntur. Quae enim de germana ratione libertatis, hoc tempore in licentiam abeuntis, de divina cuiuslibet auctoritatis origine, de legibus earumque vi, de paterno et aequo summorum Principum imperio, de obtemperatione sublimioribus potestatibus, de mutua inter omnes caritate; quae scilicet de his rebus et aliis generis eiusdem a Thoma disputatione, maximum atque invictum robur habent ad evertenda ea iuris novi principia, quae pacato rerum ordini et publicae saluti periculosa esse dignoscuntur.—Demum cunctae humanae disciplinae spem incrementi praecipere, plurimumque sibi debent praesidium polliceri ab hac, quae Nobis est proposita, disciplinarum philosophicarum instaurazione. Etenim a philosophia, tamquam a moderatrice sapientia, sanam rationem rectumque modum bonae artes mutari, ab eaque, tamquam vitae communi fonte spiritum haurire consueverunt. Facto et constanti experientia comprobatur, artes liberales tunc maxime floruisse, cum incolumis honor et sapiens iudicium philosophiae stetit; neglectas vero et prope oblitteratas jacuisse, inclinata atque erroribus vel ineptiis implicita philosophia.—Qua-

propter etiam physicae disciplinae, quae nunc tanto sunt in praetio, et tot praeclare inventis, singularem ubique crient admirationem sui, ex restituta veterum philosophia non modo nihil detrimenti, sed plurimum praesidii sunt habiturae. Illarum enim fructuosa ex exercitatione et incremento non sola satis est consideratio factorum, contemplatioque naturae; sed, cum facta constiterint, altius assurgendum est, et danda solerter opera naturis rerum corporearum agnoscendis, investigandisque legibus, quibus parent, et principiis, unde ordo illarum, et unitas in varietate, et mutua affinitas in diversitate proficiuntur. Quibus investigationibus mirum quantam philosophia scholastica vim et lucem, et opem est allatura, si sapienti ratione tradatur.

Qua in re et illud monere iuvat, nonnisi per summam injuriam eidem philosophiae vitio verti, quod naturalium scientiarum profectui et incremento aduersetur. Cum enim Scholastici, sanctorum Patrum sententiam secuti, in Anthropologia passim tradiderint, humanam intelligentiam nonnisi ex rebus sensibilibus ad noscendas res corpore materiaque carentes evehit, sponte sua intellexerunt, nihil esse philosopho utilius, quam naturae arcana diligenter investigare, et in rerum phisicarum studio diu multumque versari. Quod et facto suo confirmarunt: nam s. Thomas, b. Albertus magnus, aliquie Scholasticorum principes, non ita se contemplationi philosophiae dediderunt, ut non etiam multum operae in naturalium rerum cognitione collocarint: imo non pauca sunt in hoc genere dicta eorum et scita, quae recentes magistri probent, et cum veritate congruere fateantur. Praeterea, hac ipsa aetate, plures igitque insignes scientiarum phisicarum doctores palam aperteque testantur, inter certas ratasque recentioris Physicae conclusiones, et philosophica Scholae principia nullum veri nominis pugnam existere.

Non igitur, dum edicimus libenti gratoque animo excipendum esse quidquid sapienter dictum, quidquid utiliter fuerit a quopiam inventum atque excogitatum; Vos omnes, Venerabiles Fratres, quam enixe hortamur, ut ad catholicae fidei tutelam et decus, ad societatis bonum, ad scientiarum omnium incrementum auream sancti Thomae sapientiam restituatis, et quam latissime propagetis. Sapientiam sancti Thomae dicimus, si quid enim est a doctoribus Scholasticis vel nimia subtilitate quaesitum, vel parum considerate traditum, si quid cum exploratis posterioris aevi doctrinis minus cohaerens, vel denique quoque modo non probabile, id nullo pacto in animo est aetati nostrae ad imitandum proponi.— Ceterum, doctrinam Thomae Aquinatis studeant magistri, a

Vobis intelligenter lecti, in discipulorum animos insinuare; eiusque prae ceteris solididatem atque excelleniam in perspicuo ponant Eamdem Academiae a Vobis institutae aut instituendae illustrent ac tueantur, et ad grassantium errorum refutationem adhibeant.—Ne autem supposita pro vera, neu corrupta pro sincera bibatur, providete ut sapientia Thomae ex ipsis eius fontibus hauriatur, aut saltem ex iis rivis, quos ab ipso fonte deductos, adhuc integros et illimes decurrere certa et concors doctorum hominum sententia est: sed ab iis, qui exinde fluxisse dicuntur, re autem alienis et non salubribus aquis creverunt, adolescentium animos arcendos curate.

Probe autem novimus conatus Nostros irritos fuluros, nisi comunia cepta, Venerabiles Fratres, ille secundet, qui *Deus scientiarum* in divinis eloquiis (49) appellatur; quibus etiam »monemur; «omne datum optimum et omne donum perfectum »desursum esse, descendens a Patre lumen.» (50) *Et rursus:* «Si quis indiget sapientia, postulet a Deo, qui dat omnibus affluenter, et non impropereat; et dabitur ei » (51)—Igitur hac quoque in re exempla sequamur Doctoris angelici, qui numquam se lectioni aut scriptio[n]i dedit, nisi propitiato precibus Deo; quique candide confessus est, quidquid sciret non tam se studio aut labore suo sibi peperisse, quam divinitus accepisse: ideoque humili et concordi obsecratione Deum simul omnes exoremus ut in Ecclesiae filios spiritum scientiae et intellectus emittat, et aperiat eis sensum ad intelligendam sapientiam. Atque ad uberiores percipientias divinae bonitatis fructus, etiam B. Virginis Mariae, quae sedes sapientiae appellatur, esicacissimum patrocinium apud Deum interponite; simulque deprecatores adhibete purissimum Virginis Sponsum B. Iosephum, et Petrum ac Paulum Apostolos maximos, qui orbem terrarum, impura errorum lue corruptum, veritate renovarunt, et coelestis sapientiae lumine compleverunt.

Denique divinii auxilii spe freti, et pastorali Vestro studio confisi, Apostolicam benedictionem, coelestium munerum auspicem et singularis Nostrae benevolentiae testem, Vobis omnibus, Venerabiles Fratres, universoque Klero et populo singulis commisso, peramanter in Domino impertimur.

Datum Romae apud s. Petrum, die 4 Augusti anno 1879,
Pontificatus Nostri anno Secundo.

LEO PP. XIII.

- (1) Matth. 28, 19.
- (2) Coloss. II, 9.
- (3) I. Cor. II, 4.
- (4) De Trin. lib. XIV, c. 4.
- (5) Clem. Alex., Strom. lib. I, c. 46; 4. VII, c. 3.
- (6) Orig. ad Greg. Thaum.
- (7) Clem. Alex., Strom. I, c. 5.
- (8) Rom. I, 20.
- (9) Ib. II, 44-45.
- (10) Orat. paneg. ad Origen.
- (11) Vit. Moys.
- (12) Carm. I, Iamb. 3
- (13) Epist. ad Magn.
- (14) De doctr. christ. 4. II, c. 40.
- (15) Sap. XI, 1, 4.
- (16) Sap. XIII, 5.
- (17) II. Petr. I, 16.
- (18) Const. dogm. de Fide Cath., cap. 3.
- (19) Const. cit. cap. 4.
- (20) Ibid.
- (21) Strom. lib. I, c. 20.
- (22) Epist. ad Magn.
- (23) Bulla *Apostolici regiminis*.
- (24) Epist. 143, (al. 7) ad Marcellin., n. 7.
- (25) Const. dogm. de Fid. Cat., cap. 4.
- (26) I. Cor. I, 24.
- (27) Coloss. II, 3.
- (28) Epist. ad Magn.
- (29) Loc. cit.
- (30) Apoleget. pár. 46.
- (31) Inst. VII, cap. 27.
- (32) De opif. Dei, cap. 21.
- (33) Bulla—*Triumphantis*, an. 1588.
- (34) Bull. cit.
- (35) In 2. m. ae. q. 148, a. 4. in fin.
- (36) Bulla *In Ordine*.
- (37) Breve ad FF. Ord. Praedic. 1451.
- (38) Bulla *Pretiosus*.
- (39) Bulla *Mirabilis*.
- (40) Bulla *Verbo Dei*.
- (41) Const. 5. dat. die 3 Aug. 1368 ad Cancell. Univ. Tolos.
- (42) Litt. in form. Breve., die 6 febr. 1691.
- (43) Litt. in form. Brev., die 24 Aug. 1562.
- (44) Serm. de s. Thom.
- (45) Beza—Bucerus.
- (46) Sixtus V. Bull. cit.
- (47) I. Pet. III, 45.
- (48) Tit. I, 47.
- (49) I. Reg. II, 3.
- (50) Iac. I, 9.
- (51) Ibid. v. 5.

NECROLOGIA.

Dia 22 del corriente falleció en Manacor D. Juan Galmes Pro. titular de dicho pueblo á la edad de treinta y nueve años.

A. E. R. I. P.

ANUNCIO.

ILUSTRACION CRISTIANA.

Revista católica de ciencias, artes y literatura.

Directores-propietarios,

Sres. Buceta Rocha, Medina Guerrero y Jorreto

Paniagua.

Cada número de la *Ilustracion Cristiana* consta de 16 páginas de 41 centímetros por 30, de riquísimo papel, color ocre, impresas á tres columnas, á dos tintas y con tipos claros y elegantes.

Dos de dichas páginas, cuando menos, contienen grabados de los mas distinguidos artistas nacionales y extranjeros; doce se dedican á trabajos literarios de eminentes escritores, obras de reconocida utilidad, música religiosa, secciones amenas, etc. y dos anuncios.

Se ha publicado el primer número, cuyo sumario es el siguiente:

Texto: Bendicion de Su Santidad Leon XIII.—Cartas del Emmo. Sr. Cardenal Payá, Arzobispo de Santiago, del Emmo. Sr. D. Antolin Monescillo, Arzobispo de Valencia, y del Ilustísimo Sr. Obispo de Orihuela.—Revista del mes, por D. Francisco Perez Echevarría.—Caridad, Filantropía, Beneficencia,

por D. Carlos María Perier.—Nuestros grabados, por D. Genaro Buceta.—Noticias de un Cancionero inédito, por D. Adolfo de Castro.—El órgano de la Catedral de Fiburgo, por D. Luis Alfonso.—A la Virgen del Cármén, por D. Manuel Ossorio y Bernard.—A Sebastian Elcano, por D. F. Balaca y Gilabert.—Soneto, por el Marques de Dos Hermanas.—Flores á María, por D. Manuel Jorreto y Paniagua.—Viaje dichoso, por D. Fernando Soldeville.—Crítica literaria, por D. Antonio de Balbueno.—Revista de Italia, por Emmanuele.—Revista de Alemania, por Germanus.—Advertencias.—Libros recibidos.—Anuncios.

Grabados: La Sacra Familia (cuadro conocido con el nombre de «La Perla» de Rafael). Jesus ante el cadáver de la Hija de Jairo.—Retrato de Su Santidad Leon XIII.

La suscricion á la *Ilustracion Cristiana* que se publica, por ahora, una vez al mes, cuesta 3 pesetas trimestre, descontando del importe el giro y el real de la carta.

Los pedidos se dirigirán á las

Oficinas: Madrid, Santa Clara, 3, principal.

PALMA DE MALLORCA.

Imprenta de Villalonga.